



VLADA SREDNJOBOSANSKOG KANTONA
n/r Gosp. Salko Selman, premijer

Predmet : Prijedlog rješenja za prevazilaženje problema u sferi životnog standarda studenata i stvaranja uslova za neometan rad Studentskog centra

Poštovani Premijeru !

Imajući u vidu trenutnu situaciju, opterećenu mnogim nedorečenostima i nedefiniranim pitanjima koja se direktno tiču životnog standarda značajnog broja studenata sa područja SBK, koji, **samo uz finansijsku pomoć društvene zajednice (subvencije za smještaj u studentskom domu ili stipendije) mogu upisati, odnosno nastaviti započeti studij na Univerzitetu u Sarajevu**, slobodan sam obratiti Vam se i **ponuditi prijedlog rješenja**.

Vjerujem da ste upoznati sa tokom sudskih presuda, koje su u cijelosti u korist Studentskog centra, počev od marta 2009. godine do danas, a koje, pored glavnice, podrazumijevaju i obračun i naplatu zateznih kamata u iznosu od više stotina hiljada KM, kao i plaćanje svih sudskih troškova. Također Vam je poznato da su dogovori u Vašem ministarstvu sa studentima- stanarina studentskih domova ostali bez pozitivnih rezultata.

Ne želeći da ulazim u politiku djelovanja Ministarstva i Vlade, a u cilju prevazilaženja svih daljih nesporazuma, nepotrebnih medijskih istupa, te zaštite Vašeg Budžeta od dodatnog opterećenja obavezama po osnovu zateznih kamata i sudskih troškova, predlažem Vam, kao kolega, da **učinimo dodatni napor i prekinemo agoniju u kojoj se nalaze studenti, Studentski centar i Vaš kanton, kao i mi sami, lično**.

U tom smislu, očekujem od Vas da odmah, a najkasnije **do 10. septembra tekuće godine aktivirate sredstva rezervi Vašeg Budžeta u korist izmirenja obaveza prema Studentskom centru**, a prema ispostavljenim fakturama koje se nalaze u stručnim službama Vašeg Ministarstva obrazovanja.

Podsjećam Vas, gospodine Premijeru, da ste na zajedničkom sastanku u oktobru prošle godine između Vas, Ministarstva i mene izjavili **da ćete sve učiniti kako studenti ne bi bili oštećeni**.

Obzirom na cjelokupnu dosadašnju situaciju, uvjeren sam da bi ovim činom definitivno prekinuli sve nepotrebne i nepovoljne situacije za studente sa područja Vašeg kantona i time im **ponovo omogućili ravnopravan položaj sa studentima iz drugih kantona**.

Poštovani Premijeru, ovim putem Vam vrlo ozbiljno i svjestan svoje odgovornosti nudim da sa naše strane, **Izjavom prema Sudu, umanjimo svoja potraživanja po osnovu zateznih kamata, ukoliko Vi učinite napor i izvršite uplatu sredstava u skladu sa naprijed predloženim rješenjem**. Studentski centar, kao društveno odgovorna ustanova Kantona Sarajevo i Univerziteta u Sarajevu će u budućem periodu istrajno

raditi na poboljšanju kvaliteta svojih usluga prema svim studentima, pa time i studentima sa područja Vašeg Kantona.

Obzirom na pokušaj Vašeg Ministarstva da nekim novim "ugovorima" oteža situaciju i život studentima, koji **za vrijeme studija imaju potrebu da borave u studentskim domovima**, odgovorno izjavljujem da **nisam spreman potpisati ugovor suprotan interesima studenata**.

Ubjeđen sam da Vi razumijete da su **Kriteriji Studentskog centra za prijem studenata u studentske domove jedinstveni za sve studente iz BiH**, pa se tako primjenjuju i za studente SBK-a, te da Vam je poznato da Vaše Ministarstvo ne raspolaže sa "svojim kriterijima", o kojima se u posljednje vrijeme govori.

I na kraju, poštovani Premijeru, cijenim za potrebno da Vas informišem da je Kriterije Studentskog centra za prijem u studentske domove za narednu akademsku godinu **ispunilo 560 studenata sa područja Vašeg kantona, od čega je čak 445 ili 81 % studenata iz boračke populacije, 72 studenta ili 13 % iz šehidskih porodica, porodica palih ili nestalih boraca, dok je njih čak 379 ili 68 % sa prosjekom primanja do 150,00 KM po članu**, što znači da su ovo **studenti u sferi apsolutne potrebe za sufinansiranjem životnog standarda, odnosno ishrane i smještaja u studentskim domovima**, kao pomoć pri sticanju znanja na najprestižnijem Univerzitetu u BiH. Poznata je činjenica da studenti SBK-a u domu i studenti izvan doma, **njih oko 2.300 studiraju besplatno na Sarajevskom Univerzitetu** za razliku od većine drugih studenata, koji studiraju na, npr. Tuzlanskom Univerzitetu ili na Sveučilišu u Mostaru... ,za čije školovanje Vi izdvajate sredstva Budžeta.

Nadam se da ćete ovo moje obraćanje shvatiti kao posljednji vapaj i molbu za prevazilaženje mučne situacije u kojoj **najviše trpe studenti i njihovi roditelji koji žele, ali ne mogu, da sami svojoj djeci obezbijede bolju budućnost od sadašnjosti u kojoj oni žive. Iskreno vjerujem da im Vi i ja, kao osobe koje vrše društveno odgovorne funkcije u tome možemo pomoći**.

U želji da našu poslovnu i ljudsku saradnju vratimo na nivo koji je bio dostignut prije nastanka problema, izražavam svoju spremnost za razgovore i dogovore na mjestu i vrijeme koje Vama odgovara.

O ovom činu raspoloženja i volje da se prevaziđu aktuelni problemi, obavijstit ću studentska udruženja, relevantne institucije i javnost.

S' poštovanjem,

DIREKTOR

Emir Kadrić, dipl. oec.